



Man Utd-i Santos atema pound million
50 agütsütsü mulunga agizükogo

Ukraine-i patriot missiles yanglutsü
licence angutsü: Trump

Yimya shidak amshia leave agitsüla: H&FW Department

Dimapur, Chiteni/July 09 (TYO): Department senden ka May 14, 2026 nü amendang telemetba agiba ama, Health & Family Welfare Department kübok Medical Officers aser tanga medical personnel ajunga leave agidang yimya shidak amshia agitsüla, ta Health & Family Welfare Department, Nagaland ajanga sangdong ka nung metetdaksü.

Nüngdakba ketdangsür nungi sanction süa aliba leave jelia memeshi officer shinga station yutsür maotsüla, ta Department-i metetdaksü.

Chief Medical Officers

(CMOs) aser Medical Superintendents leave aginer temi nüngdakba leave sanction meshiba den station yutsür maodang pei aliba district nung Deputy Commissioner nem osang agütsütsüla. Leave Sanctioning Authority jenjang nung leave records shidak ayutsüla, ta ashi.

Item totuyuba nung aibelener tem süoki ia reprangtsü aser sorkar indang ozüing tapet agi merenshitsü. Iba totuyuba sülen ajaki shidak anidaktsü atema metetdaksür, ta Health & Family Welfare Department, Nagaland ajangasa ashi.

NST bus ka tsükok, nisung ka asü aser aikayiru

Dimapur, Chiteni/July 09 (TYO): Brehostibarnü Nagaland State Transport (NST) bus ka Mon nungi Tobu leni aoba mapang Wokha area nung tsükoka nisung ka asü aser aikayiru.

Iba lendong ya nikongdang 3:00 aser 3:30 ako tsüingta atalok, kong bus ya longbang leni longzüka alu ta osang

angazüker.

Iba lendong ya kecha ajanga atalokar ano mejangja. Iba lendong nung yirurtem ya Mon District Hospital nung anir oa temang anepalutar aser iba osang züluba mapang tashi iba lendong atalokba indang osang tejangja ketdangsürtemi sangdonga mali.

SC-i state nung Excise constable 46 shimba mapa soiter

Dimapur, Chiteni/July 09 (TYO): Supreme Court-i Nagaland nung Excise constables 46 shimba maparen soitogo, anungji Gauhati High Court-i state sorkar dang item constables shimba maparen tembangtsü mela totuyuba agüja aliba soiter.

T Akon Pho maser tanger temi Special Leave Petition (Civil) ka benoka aliba Justices Ahsanuddin Amanullah aser Sheel Nagu nati kumtetba Bench kati July 7, 2026 nü angadang danger State of Nagaland nem iba totuyuba ya agütsü aser July 7 nü aliba status quo ya tarutsü nung iba ken o mejembi tashi amshia alitsü totuyuba agütsü. Iba ken o ya August 31 nü jembitsü renema ayu.

Petition ya June 23 nü Gauhati High Court, Kohima Bench indang Division Bench kati obendang agütsüba anema benokba liasü, kechiaser iba Bench yagi taoba mapang Single Judge obendang agentsü aser Excise constable posts 46 indang recruitment process maneni inyaksü temeden agüja liasü.

Excise department ajanga recruitment exercise tenzükadoker lia written examination agitsü sangdong

agütsüba sülen iba recruitment process anema ken o benoka atsütepa aru.

Mezüng advertisement ya April 7, 2025 nung agütsü aser Excise constable posts 40 atema liasü, kong selection process nung physical test aser viva voice agitsü ashi. Iba sülen ano tera melenshia sangdong ka agütsüba nung vacancies ya 46 kumtsü. Iba sülen Departmental Recruitment Board ajanga ano written test agitsü sangdongba yong candidates telok kati sorkar temelaba makai recruitment ozüing melenshi ta nokdak.

October 2025 nung Gauhati High Court, Kohima Bench ajanga written test ya metemsü ta obendang agütsü aser recruitment process tenzükur department-i shimba yimya memelenshitettsü ta ashi.

Ajisüaka taküm June ita Division Bench kati state sorkari benokba ama competitive examination agitsü Departmental Recruitment Board dak tashi lir ta obendang agüja nübu shimba mapa maneni inyaksü mela.

Ajisüaka Supreme Court-i tang asoshi totuyuba agütsüba ajanga tarutsü nung totuyuba ka magütsü tashi iba recruitment inyakyim anena atatsü.

NSSSA-i Nagaland nung kaket rejutem asadangtsü: Advisor Yhome



Advisor, School Education Dr. Kekhrielhoulie Yhome aser Advisor, SCERT and Food Processing, Achumbemo Kikong den Chief Minister's Meritorious Students Fellowship Award angurtem Capital Convention Centre, Kohima nung July 9, 2026 nü tangokba noksa ka yangi angur.

Dimapur, Chiteni/July 09 (TYO): Tang tasen amenoka aliba Nagaland State School Standards Authority (NSSSA) yagi HSLC aser HSSLC examination results kisüing masadangi 'quality parameters' balala nung kaket rejutem asadangtsü, ta Advisor, School Education Dr. Kekhrielhoulie Yhome-i Brehostibarnü ashi.

Nagaland Board of School Education (NBSE) ajanga agiba HSLC Examination 2026 nung tematiba jenjang 50 angur asoshi Kohima nung Chief Minister's Meritorious Students Fellowship Award (CMMSFA) sentong ayongzükba nung jembidang, tang state indang kaket reju inyakyim kanga melenshiba mapang lir, ta Yhome-i ashi.

Kaket rejutem ya nüburtemi angatetba aser board examination results ajanga asadanga aru, saka NSSSA kübok government aser private schools tem 'performance indicators' balala nung ajemdaker asadangtsü, ta pai ashi.

"Tanga linüktem nung ama asen kaketshir tem shisaliok tajung ngudaktsütsü asoshi iba mera ya agir. Educational leadership tashi itshitsü tema School Education department aser State Council of Educational Research and Training (SCERT) nati School Leadership Academy ka tenzükogo," ta Dr. Yhome-i ashi.

Digital putu nung maongka balala aliba athishia jembidang pai kaketshirtem dang mangdang tajung ayutsü aser internet nung ajemdaker angazüktsü akokba resources tem tajungtiba nung amshitsü ayongzüka liasü.

Iba sentong nung Top 50 category kübok kaketshir 56 nem tetushi agütsü, kechiaser kar ranks kasa liasü. Parnok rongnung Chümoukedima-Dimapur circle nungi kaketshir 17, Kohima nungi 16, Wokha nungi 10, Mokokchung nungi pongu, Tuensang nungi pezü aser Zunheboto, Kiphire, Noklak aser Phek nungi ka-ka liasü.

Advisor Yhome-i toppers

kata government schools nungi mali, ta ashi. Paisa sempet angurtem rongnung tetsür 43 aser tebur 13 lir, anungji teburtem dang nungi tetsür temi tajungba takok angu, ta ashi.

Sempet angurtem tenüng nung Isaiah Ability Higher Secondary School, Wokha nungi Rank 3 tongteter Benchumo Tungoe aser St. Mary's Residential School, Alichen nungi Rank 8 tongtetla Imnayangla nati sentong nung jembia liasü.

Iba sentong tenzüka Khekavi K. Yeptho, Pastor, Sumi Baptist Church, Kohima ajanga sarasadem aser Baptist School, Botsa, aser Government Higher Secondary School, Kigwema ajanga temeja ken ka-ka tena liasü.

Dr. Yhome-i kaketshir 56 nem sempet aser kulizüing kaket agütsü aser L. Jamithung Lotha, State Mission Director, Samagra Shiksha, Nagaland ajanga melepzüing o jembia sentong tembang.

"Fed Up Nagas" nüngja Naga Youth Movement agi melenogo

Dimapur, Chiteni/July 9 (TYO): "Fed Up Nagas" teloki parnok nüngja Naga Youth Movement agi melenba officially metetdaksüogo. Iba Movement ya grassroots mass movement ka lir, koba tarutsü nung yimden yimsüsüba tamendakdak takangka asoshi tesem balala nung aliba Naga nungertem ajak ola angashidaktsütsü atema tenzükba lir, ta iba lokti tentet lenirtemi ashi.

"Fed Up Nagas" nüngja ya kanga tesashi ama bilemer aser iba movement ya yimjung nung inyaksangshiba inyakyim ka südaktsüner. Onoki sensaksem aser ajak den sendaktepa tejakleni oner. Onok nükjidong tejangja-onoki yimjung aginer aser mangateter ama inyaksangshi mesüner. "Fed Up Nagas" nüngja ya-a tensa den peter, saka onok

tang nükjidong tuluba ka asoshi tejakleni aotsü meranger, ta iba lokti tentet yagi ashi.

Brehostibarnü osangbenertem den sensaksemba mapang iba lokti tentet lenirtemi, parnok nükjidong tongtibangtibaji küm ter tejakdang India sorkar, NSCN-IM aser NNPGs tem tsüingda tenangzüktepba ana nung sign süteper aliba tangsa tang benokdaktsütsü atema lir. Item tenangzüktepbatem ya tezüluba nung dang ayutsüba masü saka mapang küma inyaka aotsü asoshi lir, ta parnoki ashi.

Lenirtemisa, parnoki puti otsü melenshitsütsü meranger masü mesüra kin o kin tsüingda telemidang adokdaktsütsü atema inyaker masü, saka ajak asoshi yimden yimsüsüba tsütsü telemetba ka agitsü asoshi dang parnok rangloker lir, ta

jangjashitsü. Parnokisa, lenla ajak nungi teyari agitsü atema mulunga aliba lemsatepogo.

Official tezüluba nung takhangba ka Nagaland Angh nem agütsütsü atema senden ka amenba sülen NYM-i, state mesüra international arrtsü kecha mesükshi-i Naga nungertem longjemtsü ayongzüka liasü. Parnokisa, lokti tentet balala, kaketshir lokti tentet aser Arogo lenirtem dang kecha tebandang makai iba inyakyim ya nongita yaritsü ayongzüka liasü.

Onok temeshi ta ashir masü aser onoka tashi mait lir. Ajisüaka asen limai yimjung asoshi ayimtener ta onoki angateter aser onoki taruba putu asoshi jenjang tajungba ka atema iba movement Tsüngrem kabuma nung bendanga toktsür, ta lenirtemisa shisem.

Angh-i Tribal Affairs Department asadang



Dimapur, Chiteni/July 9 (TYO): Nagaland Angh Nand Kishore Yadav menden ser Tribal Affairs Department lepareprangshiba senden ka July 9 nü Lok Bhavan, Kohima nung menogo. Department-i tang benoka inyaka aliba sentongtem, takoktem aser tarutsü sentongtem asadangtsü asoshi iba senden menogo.

Senden nung department-i inyakyim, tongtibang scheme tem, infrastructure project tem aser state kübok mapa balala benoka inyakya aliba indang osang tejangja agütsü.

Senden nung dena aliba ketdangsürtemi budget allocations, Article 275(1) kübok terenlok, Development Action-Janjatiya Unnat Gram Abhiyan (DA-JGUA), Pradhan Mantri Adi Adarsh Gram

Yojana (PMAAGY) aser tribal tem aliba tesem ajangzükba community infrastructure project balala benoka inyakba indang osang tejangja agütsü. Angh-i tang tinyakdak aliba aser tembanga inyaker aliba project tem asadanga liasü.

Senden nungsa state nung Eklavya Model Residential Schools (EMRS) terenlok indang lepa reprangshia liasü. Ketdangsürtemi ashiba agi, ajak senteper state nung tang EMRS asem inyaksangshidar, kong kaketshir 751 züngdang ta ashi. 2026 küm HSLC tatidang nung item school tem nungi kaketshirtem noklang nung noklang takok nguogo, ta ketdangsürtemisa metetdaksü.

Maneni district tem nung EMRS campus tasen yanglua aliba terenlok aser ali ken o,

power aser tzü aser lenmang amala ken o dak sendakba nung tetsükdaksü aliba indang Angh nem metetdakja liasü.

Angh-i tribal development programme tem takok ngua benoka inyaksü, infrastructure project tem mapang shitak nung tembanga inyaksü aser beneficiary tem ajangzükdaksütsü atema teka nung aliba resources tem kanga junga amshitsü koda tongtibang iba indang lemsatepa liasü.

Paisa, Nagaland kübok tribal tem lenla ajak nung terenlok atema stakeholder tem ajak teka amteper inyaksü nüngdakba lemsatepa liasü.

Iba senden nung Tribal Affairs Department aser Governor's Secretariat nungi ketdangsürtemi shilem agia liasü.

Canara Bank-i DC office Kohima nem computer agütsü

Dimapur, Chiteni/July 9 (TYO): Corporate Social Responsibility (CSR) inyakyim nung shilem ka ama FY 2026-27 atema Canara Bank, Kohima Branch-i Deputy Commissioner's Office, Kohima nem July 8 nü

office computer tem agütsüogo.

Computer tem ya Deputy Commissioner, Kohima, B. Henok Buchem, NCS, aser Revenue Officer, Kohima, Kevingoto Kulnu, NCS na matsüngdang DC Office

Chamber nung agüja liasü.

Office infrastructure akangshidaksütsü aser nüburtem tenzükba wadang takok ngua benoka inyakdaksütsü nükjidong nung iba inyakyim benoka inyakogo.

East Dimapur Town atema census senden menogo



Dr. Diana Patton, ADC, Dimapur aser Extra Assistant Commissioner aser Town Census Officer, Dimapur Imliwabang Aier, NCS aser tanga ketdangsürtem Census exercise atema senden ka amenba mapang tangokba noksa nung angur.

Dimapur, Chitenii/July 9 (TYO): East Dimapur Town nung tang benoka inyaka aliba Census exercise atema senden ka July 9 nü Deputy Commissioner, Dimapur office nung menogo. Senden ya Extra Assistant Commissioner aser Town Census Officer, Dimapur Imliwabang Aier, NCS lenisüba nung agia liasü.

Senden nung o jembiba mapang Dr. Diana Patton, ADC, Dimapur-i, councillor aser Gaon Bura tem dang House Listing Operations mapang enumerators tem nongita yaritsü ayongzuka liasü. Laisa, Census data shitak

bendentsü ya kanga tongtibang ta shia ken o dak sendaka alir ajak dang iba inyakyim ya takok ngua benoka inyaksü atema Census ketdangsürtem den teka amteper inyaksü mepeshia liasü.

Kasa mapang nung ImliwabangAier-i, Census inyakyim nung teka amteper inyakba asoshi councillor aser Gaon Bura tem dang kanga pelaba lemsatepa liasü.

Pai, House Listing Operation ya tang benoka inyakdar ta shia senden nung dena alirtem dang pei kiyong nung alirtem nem Census ya koda tongtibang iba indang

tangazükba agütsütsü mepeshia liasü. Paisa, enumerator tem den teka amteper inyaksü aser Census data shitak bendentetsü atema osang shitak agütsütsü mepeshia metetdaksüogo.

East Dimapur Town nung tang benoka inyaka aliba Census operations kecha tetsükdaksü makai takok ngua inyaksü atema teka amteper inyaksü mepeshiba sülen senden tembanga liasü.

Iba senden nung East Dimapur Town Council (EDTC), aser East Dimapur Town kübok ward ajak nungi Gaon Buras temi shilem agiogo.



Office of the
WAMEKEN BAPTIST CHURCH
B.P.O. WAMEKEN-8-1014
P.O. Tuli, Dist. Mokochung, Nagaland - 798 618
(You are the light of the World. Matt. 5:14)

PELABA LEMSATEPER

Wameken Arogo nung 1976 asentenshi adoker küm 50 ajungba Jubilee, May 30, 2026 anogo nung Tsüngrem taochi ajanga temoatsü nung mongogo. Iba Jubilee mong asoshi Shri. Metsübo Jamir (Hon'ble Minister, Rural Development, SIRD, Govt. of Nagaland) aser chirnur kibongtemi molungsoa tenla tulu agütsüba Arogo-i kanga molungnena pelaba lemsateper. Tsüngremi maneni parnok kibongtem moajangma.

Sd/-
Sentichuba, Pastor,
Wameken Baptist Church.

Chumu nung Census House Listing awareness sentong agi

Dimapur, Chiteni/July 9 (TYO): Census House Listing (HLB) dak sendakba nung Urban Local Bodies (ULBs) den senden ka July 8 nü Deputy Commissioner's Conference Hall, Chumoukedima nung menogo.

Senden ya Additional Deputy Commissioner (ADC) Lemlila Sangtam-i (NCS) lokti pela agizükba o jembir tenzuka liasü. Iba sülen Charge Officer aser EAC Er. Khriengunuo Theunuo (NCS) aser Liaison Official temi Census inyakyim ya koda tongtibang aser data shitak bendentsü atema field personnel tem shilem koda tongtibang iba indang lemsatepa liasü.

Senden nung o jembirtemi Census inyakyim nongita yaritsü atema Urban Local Bodies-i yakyaka shilem agitsü koda

tongtibang iba indang lemsatepba den züngsemtem dang nüburtem nem tangazükba agütsütsü aser Census takok ngua bendentsü atema teka amteper inyaksü mepeshia liasü.

Senden nung Census shilem ana küma lemsar inyakba indang züngsemtem nem metetdaksü. Mezüngbuba shilem koba House Listing lir iba ya July 1 nungi 30 nü tashi benoka inyaksü aser tanabuba shilem ya 2027 küm February ita agütsü.

Linük ajunga nung benoka inyaka aliba iba inyakyim ya takok ngua agitsü atema Census ketdangsürtem den teka amteper inyaksü atema stakeholder aser lisopur ajak dang mepeshiba sülen awareness campaign ya tembanga liasü.

Niuland nung Consultative senden ka menogo



Dimapur, Chiteni/July 9 (TYO): District Administration, Niuland aser Census Department na Census dak sendakba nung consultative aser awareness senden ka July 9 nü DC Conference Hall, Niuland nung menogo.

Sentepa aliba lokti den o jembiba mapang Deputy Commissioner Niuland, T L Kiusumong Tikhir-i, tang benoka inyaka aliba House Listing Operation (HLO) ya census 2027 nung mezüngbuba shilem lir, aser iba inyakyim ya yimtsüng nung lenirtem den angatettepba tesem ajak nung benoka inyakdar ta ashi. Paisa, lokti lenirtem dang district nung census inyakyim takok ngua benoka inyaksü asoshi census ketdangsürtem den teka amteper inyaksü mepeshia liasü.

DC-isa, census bendenbaji nütsüngyongsük züngdangtsü atema dang aser iba ya electorate, delimitation, Addhaar Card mesüra Pan Card nunger

dak kecha sendaka mali, ta shia ken o jangjashitsü. Iba dak sendakba nung tang tilidak tesem nung asü pei yimtsüng nung züngoksemtsü ta nüburtem aika mangmangtepa aliba indang jangjashija DC-i, census inyakyim kübok nisung ka tesem ka nung ita trok dak tema lira pa/la pei yimtsüng nung masü saka iba tesem nung züngoksemtsüla ta shi lir, ta ashi.

Deputy Director, Census Department Vikishe Chishi-ia, Enumerators aser Supervisors tem indang shilem metetdaksüba den lokti lenirtem dang data shitak bendentsü atema nüburtem den angatettepa inyaksü mepeshia liasü.

Niuland Town Council mendenbuba Hovishe, Village Head GB, Ward GB, Niuland Town Students 'Union tir, Niuland Town Sumi Totimi Loka, Niuland Citizens Forum aser Niuland Town Public Organisation nungeri iba senden nung shilem agia liasü.



July 09, 2026 nü Melbourne nung Ato kilonser, Narendra Modi-i Governor of Victoria, Margaret Gardner den senden amendang tangokba noksa nung angur.

India aser Australia nati tongtibang tezüngzüktep kar agi

New Delhi, Chiteni/July 09 (Agencies): Brihostibarnü India aser Australia nati nuclear energy, defence aser tzüym nung security atema tezüngzüktep kar agiogo.

Ato kilonser Narendra Modi aser Australia Ato kilonser Anthony Albanese na Australia-India Annual Summit senden nung adenba sülen osangbenertem den jembidang lenir anapronglai defence, shishilembaba, energy, tongtibang technologies aser shisaliok sectors nung tesendaktep ano tajungba nükjidong nung tezüngzüktep agiba sangdong.

Tezüngzüktep tongti rongnung kaji Uranium Supply tezüngzüktep liasü. Iba tezüngzüktep kübok Australia-i India dangi uranium supply

vyoktsü.

Ato kilonser Modi-i, "Nuclear energy atema tezüngzüktep agiba ajanga Australia-i India nem Uranium supply agütsütsü," ta metetdaksü.

Australia Ato kilonser, Albanese-i, 2015 Australia-India Nuclear Cooperation Agreement kübok Uranium supply asütsü, ta metetdaksü.

Modi-i, "Künatisa, alima tesem balala nung tensa majungba aser rara aliba ya ken o jembiba ajanga dang bentettsü ta bangjemogo. Indo-Pacific region tesem ajaklen yimjung aser tesünep aliba den külemi tzüym nung sademsadema senzütettsü atema onoki inyaksü bangjemogo," ta metetdaksü.

Region nung aser alima nung

tayongzükba balala aliba mapang ka nung lenir anatisa defence aser security tsütsü taliba amalitepa inyaksü bangjem.

Ano tzüym nung security atema amalitepa inyaksü asoshi Modi aser Albanese nati India-Australia Maritime Security Collaboration Roadmap sangdong.

Modi-i, "India aser Australia na ya democracy tashi itta aliba linüktem lir aser Ocean nung tashi tulu aliba linük ana lir," ta metetdaksü.

Lenir anatisa linük anaprongla tajangzük angutsü atema rongsenketzung dak sendakba tezüngzüktep ka agi. Iba tezüngzüktep kübok 'Make in India' aser Australia nung Future Made in Australia na amalitepsü.

Maharashtra nung UCC draft asütsü atema committee ka tentetogo

New Delhi, Chiteni/July 09 (Agencies): Brihostibarnü Maharashtra Chief Minister, Devendra Fadnavis-i, Uniform Civil Code (UCC) ozüing draft asütsü atema state sorkari committee ka tentetogo, ta metetdaksü.

UCC draft committee nung tongtiji retired Supreme Court judge, Justice Ranjana Desai lir aser committee nung züngsemtemji taoba mapang high court nung judges- RC Chavan aser SG Mehare na, taoba mapang Maharashtra chief secretary DK Jain, taoba mapang advocate general Virendra Saraf, linük temzung tsütsü mongin, Ramesh Patange aser shisashir Suvarna Rawal nung lir.

Sorkari committee dang report ji ita trok tsüngda agüjang ta tuyuogo.

Fadnavis-i, "Nagpur nung asükwa mongpu state legislature senden aliba mapang nung iba ozüingji benoktsü atema onoki merangtsü," ta metetdaksü.

Assam aser Gujarat na nunga UCC ozüing draft asü tenzükogo. India nung UCC mezüng benokba state ji Uttarakhand lir.

Maharashtra nung UCC

ozüing renemba mapang nung Uttarakhand nung benoka aliba UCC ozüingtem-a asadangsü.

Tamalen Fadnavis-i, sorkari UCC ozüing ka benoktsü; Uniform Civil Code benoktsü atema apitetba ya Directive Principles of State Policy nung lir, ta metetdakja liasü.

Maharashtra nung UCC draft asütsü atema committee tentetba sangdongba sülen Congress lenir Sachin Sawant-i, "Directive Principles of State Policy nung Uniform Civil Code dak sendakba ka lir, aser iba ya taoba mapang Ato kilonser Jawaharlal Nehru-i linük temzung nung benokba lir," ta metetdaksü.

Paisa, UCC nung o entepba mapang nung Fadnavis-i Nehru-i inyakba shilem-a züngshi nungbo jungla, ta metetdaksü.

UCC pusema Shiv Sena lenir, Manisha Kayande-ia, mapang talangka nungi Uniform Civil Code ka benoktsüji party tangatetba lir, ta ashi.

Laisa, asür Bal Thackeray-i tongtibang onük asem nung ajemdaker BJP den tesendaktep yanglua liasü, aser item onük asemji- Ram tekülem ki asütsü, Jammu & Kashmir nung Arlla 370 agientsü aser Uniform Civil Code onüktem lir, ta metetdaksü.



Mumbai, July 09, 2026: Japan Maritime Self-Defense Force (JMSDF) indang raraba rong 'JS Takanami (DD-110)' Mumbai tzüküm tonga arudang tangokba noksa nung angur.

Delhi nung ki chirepba lendong nung nisung asem asü aser ka yiru

New Delhi, July 09 (Agencies): Delhi kübok Rohini kiyong nung ki chirepba lendong nung nisung asem süogo aser iba tatalokba dak senakba nung FIR ka benokogo.

Bodhbar aonung pezüben amentepa asüba ki chirepba sülen kümzükba maparen tenzükba liasü.

Deputy Commissioner of Police (Rohini) Shashank Jaiswal-i, "Kümzükba maparen inyakba mapang nung aayanger ka, Saddam alias Ravi (32) jana nungi atsüteta treatment agitsü atema anir ogo aser tasümay asem agitet. Asürtemji sü arür Ram (42), aayanger Kafe alias Nurul (24) aser ki kibur tebu Ram Dua (62) nung lir ta jangjaogo," ta metetdaksü.

Nikongdang 4:20 ako meta ki chirepba sülen Police, DFS, National Disaster Response

Force, Municipal Corporation of Delhi (MCD), Revenue Department aser tanga agency balalai gol amshia kümzükba maparen tenzükba liasü.

MCD-i, SARAL scheme kübok iba kiojen atema 'sanctioned building plans' liasü, koba ajanga architects mesüra engineers nungi kuli agütsüba ajanga building permits angur, ta metetdaksü.

MCD-i ashiba agi, ki chirepba mapang nungji ki telung nung tzü pipe dak sendakba maparen teinyakdak liasü.

Tang India tesem balala nung tzünglu sashia aruba ajanga lendong kanga bulua atalokdar. Mongolbarnü Kerala kübok Wayanad nunga anentsüh lendong nung nisung pezü süogo aser Maharashtra nunga tzünglu dak sendakba lendong balala nung nisung 13 süogo.

UGC-NET June 2026 exam paper leak asüba bushisüngdang

New Delhi, July 09 (Agencies): India nung ano maneni UGC-NET June 2026 exam paper-a leak asü, ta osang prokba sülen Education Ministry-i National Testing Agency (NTA) dang ibaji jungjunga bushisüngdang, ta tetuyuba agütsüogo.

Tapak 100 aliba PDF ka UGC-NET sociology paper renemba den sendaktepa lir, aser iba PDF ji exam magidang prokshia liasü; iba dak alia PDF nung aliba questions 90 shibo shidakba question paper nung aliba den kasa lir, ta osang angazüker.

Bodhbarnü Lok Sabha nung opposition lenir, Rahul Gandhi-i X ajanga, question paper

renemba den sendaktepba aliba PDF ji NTA ket nung dang alitsüla, ajisüika exam magidang iba PDF ji prokshi, ta metetdakja liasü.

Rahul Gandhi-i, "Taoba hopta agiba UGCNET exam dak sendakba nung tang osang ka angashiba ajanga kanga aoksar. Hopta ishika tejaklen ang NEET paper leak asü aser tang UGC-NET exam magidanyongi tapak 100 aliba PDF prokshi ta osang angazüker," ta metetdaksü.

Paisa, question paper ji Bihar, Uttar Pradesh, Haryana, Delhi aser Rajasthan state tem nung sen lakh 2.25 agi ayok aser kasa network ajangasa tarutsü nung agitsü aliba tatidang balala-

CSIR-NET, HTET aser ADA indang-a papers agütsütsü ta shiogo ta tai tonglokja lir, ta ashi.

Taküm May 3 nü agiba NEET-UG tatidang paper leak asüba sülen yimtenren nung kanga aitsütepa liasü, iba sülen sorkari exam balala junga ketdangsüa agitsü nangzükba liasü.

UGC-NET sociology tatidang agütsür candidate temia question paper nung 'spelling' tai aika liasü, tenüing aika tai aser Hindi oshi nung meyipzükba ji temejung mesüli liasü, ta shiogo.

UGC-NET tatidang ya assistant professorship, junior research fellowship aser PhD programmes atema NTA-i ketdangsüa agir.



July 09, 2026 nü Pune nung tzünglu kanga aruba ajanga asemben amentepa asüba ki ka chirepba aliba noksa nung angur. Iba lendong atalokba sülen NDRF aser Army temi nisung 9 kümzükogo.



TIR YIMYIM YIMOBILEM (EDITRIAL)

DIMAPUR FRIDAY, JULY (CHITENI) 10, 2026

Shibai shiba li atsünger ?

Assam nungur kidangertemi parnok meyong ali hectares 82,751 atsünga agia aliba nungi Nagaland-isa tuluba atsünga agia lir ta Assam Border Protection minister-i ashijaji asenok asoshi tamangmangtsüka lir. Pai yakanü parnok tatar senden nung jembidang, tang Naga nungertemi Assam li atsünga agia alibaji tasazük nung hectare 59,490.21 agia lir ta metetdakja lir. Atangji, Naga nungertemi atsünga agia aliba tesemji koba tesem nungsa aliar asenokibo mejangjateter, ajisüaka Assam den arrtsüsa aliba kin ana Lotha aser Aor na aliba tesemtem nungang Assam nungeri parnok meyonga ta bilemba tesemtemji alitsü südi. Ano, asenok Mokochung district kübok Tzurangkong nungbo tang tashi Assam police station kabo lir, aji asenok asoshi arrtsü indang jembiba ken o nung timtem aser tamakok ka asütsü. Aji oda, asenoki aiben angateter mangatetka, Naga nungur aliba tesem ya Assam kübok liasü ta jembir. Atangji, ibaji British nungur yimsüsüba mapang nungi India yimten nüchiso ngur külena tang aliba Nagaland ya state maküm tashi Naga nungur aliba tesem tesadang ka shibo Assam state kübok liasüba agi, Naga nungur ya Assam kübok liasü ta jembir. Aji shitak, ajisüaka yimten ka kübok külemi Assam ta ser aliba dang ashi, Naga nungurji kodanga Assam nungur maküm aser Naga nungur lija kodanga Assam nungur li maküm. Ibaji metentsüa, Nagaland state akümba ken o, koba dang 16 Point Agreement ta ajar, iba nungjia Naga nungur meyong Assam kübok aliba arem wazüka aliba, reserved forest, tesemtemji Nagaland nung adentsü ta shia lir. Ajisüaka, iba aremji Nagaland kümer sülen kodanga Naga nungur keti maru, anungji koba aremsa tang tashi Nagaland aser Assam na tsüngda wazüka yua lir, item li ajungaji Naga nungur meyong asütsü. Ajisüaka, Nagaland state akümba sülen '16 Point Agreement' mapa küma aotsü asoshi onük ka nungi kata reprangshia inyakba Nagaland government otsü nung malitsü südi. Aji oda, tenüng agi kilong nung mena yur, Naga nungur aliba tesem ajak Nagaland state küboki aitsüla ta tatar senden nung lemtetpet lemtetba dak alaka, iba ken o bener mapa akümtsü asoshi kidang nungi ayazüka oa jembiba anogobo Nagaland government otsü nung malitsüa akok. Iba jagi asen li ser nung tangar li kümdaktsüogo. Iba jagi tanübo asenoki asen li agir ser nung tangar kidanger li rakzüker ama kümadoker. Atangji, ali madak nisung kibur masü, kechiyong alima ya nisungi yangluba masü, Tsüngremi yanglu, anungji kiburbo Tsüngrem lir. Ajisüaka, Tsüngremi Pa alitsü aser Pa agitsü atema yanglu masü saka alima ya nisungtem lidaktsütsü asoshi yangluba tesem lir, anungji shirnoki koba tesem nungsa temulung agüja aliji pei meyong ama küma anepaludir, iba tesemji parnok meyong akümer. Tanü Assam kübok Golaghat, Jorhat aser Sibsagar district kübok Nagaland tsütsü parnok li kümer aliba tesemtemji tulubalenka Naga nungur meyong li lir. Iba jagiang item tesemtem nungji amshiba nungjakojatem aika Naga nungur dak aketba nungjakojatem angutsü. Atangji, joko asenoki mezünyongi kibur küma anepalu masü yutsü nungji, tangbo arrtsülen asen tsüraburtemi mesemteta yutsüba alushi tulubalenka Assam nungur meyong kümogo. Iba ken o ji tanü tashi obendangdak tepdaka lir aser obendangertemia obendang magütsüteter, kechiyong akhi map nungbo aliji Naga nungur li saka nisung telidak purtemjibo Assam nungertem lir, anungji obendangertemi obendangdak masü saka kidanger ana tsüngda tangatetep nung arrtsü ken o latettsü asoshi ajungshir. Iba nungji asenok akoksar, kechiyong Assam nungurbo government-i government li asütsü asoshi atsünga atsünga atur saka Nagaland government-ibo kodanga Nagaland government li asütsü asoshi tebilema mebilemer, anungji tejembia mejembir aser teinyaka meinyaker. Aji oda, Assam nungurbo Assam li asoshi government-i rarar saka Naga nungurbo Naga nungur public-i merara aser menokdangra, asüng Mokochung, Wokha, Dimapur aser Niuland district-tem kübok aliba tesemtemji Assam government tashi amshia agiadoktsü ana nung lir.

OLEMSABANG

Aor tangari tetla-tetshiba kin ka küma aor asü ?

~ L. Kika Pongener

(Yashi adok nungi...)

Aji oda, tajung kümdaktsütsü asoshi aibelendang arrtsüa merenshitsüji tim dang.... Saka tim dak tali merenshitsü menungdaker aser aji Tsüngrem tsüngdang aser alima nubur matsüngdanga khuret aser sentsüh tulu asütsü. Otsüla-oboula nungeri jembia aruba agi...Shirnoki ashi-auar dak tali-tapong züka merenshir, ibaji pei dak zükloker ta takzüa aru. Tetezü....Pei chirnur aser semchi-semnur ashi-auar küma aor aser soteter ta takzü-takponga aru. Ano shirnoki lajar-menjar mesen-metoea mezüngmeshir....Par chirnur aser semchi-semnur-a putu ka nungpo laja-menjar akümer ta takzüa aru. Shirnoki kidang kilir-menlir mesen-metoea mezüngmeshir aser tali-tapong züka merenshir.... Putu ka nungpo par chirnur/semchi-semnurji tangar kidang kilia senzütsüsa mapangi bentsür arur ta takzüa aru.

Küm ishika suiogo, asen Aor tulur kibong tajung ka kidang....Arunachal nungur asangur chanu ka school züngdaktsütsü aser ki mapa nung yaritepa lidaktsüba....Saheb-ba jagi asangubaji anepdang/aonung shia yi Dokan-i Yi alitsü yoker aser Mim-Saheb lai-a anogo shia Pan Dokan-i Pan alitsü yoker....ta otsü ka angazük. Iba asangubaji sodi mapang par tsürabur dangi aodang; par Saheb-ba o Mim-saheb-la na otsüji tsürabur dang aser par yimer dang kechi koda-ka shir alitsü (?) Ashiko, asanguba jagibo Aor kidang alitsübaji Kodak lima nung alitsü amai imlaseta arur alitsü sudi. Ano asen Aor takar kibong ka kidang lidaktsütsü Tzümar chanu ka anir aruba....Anir aruli dang tanübosang tenungji 'Moaba' jatsü. Ajisuaka, kopika meli-i Moaba-ji tenung dak jaloka....Chisung-aonsung moa, suoshi tejen-teshisa-tapok moa; tekapu aser tetsüng-teben moa....ta par kiyonger-kidangeri jatettsüba otsü ka lir. Aji oda, Moaba nemji chisung-aonsung dang chiyungdaktsür....Apen-suoshi tajung mesemdaktsür; saka anepdang aonung shia züka merenshir....Apok-atsü agi masü....Tetsüng-teben agi tu-tua mesuba otsü ka lir. Alima talang nung oa Mission mapabo aika-sa inyaker....Saka kidang kilir-menlirbo shiruru jenjang nung ayuba kibong.

Aotsür Aor tulurtem, taka-taitertem, missionary-tem, Tsüngrem tenzükertem....Asen Aor lilbaliru khen meyipa reprangshia melenshitsü mapang kati memupogo. Aotsür Aor kidang kilir-menlir ayuba teimba ka kanga-sa timtema reshikangshia ayuba otsü/osang angazükdang kanga dang aakseta bilemer. Asenoki asen kidang kilir kanga junga anepalua ayutsüla. Kilir nem asen den küsa chiyungdaktsütsüla; asen chirnur den küsa apen-suoshi subodaktsütsüla. Asen kidang tangar memenupba kin ka, sensaker, mokokmeiner; tsürabur mali lajar ka; kanga junga anepalua sayuteta, nisung tajung kümdaktsübaji.... Mission mapa tulu inyakba den küsa asütsü. Alima talang nung sen aika endoka Mission mapa inyaker....Saka kidang aliba kilir-menlir-bo mesenmetoea ayur.... Anungji asen Aotsür Aor shir kidang-sa teyariteper kilir-menlir yua lir....Ajaki item kilir dang kanga meima anepalua benshidi.

Asen kibong ajanga Aotsür Aor ajak tenung menuktsüsa tansutsü mapa kecha meinyaktsü kanga kümdanga lidi.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Iran nung ketdangsertemi tashiyim amshia Tenla ki karakzüker



Iran yimtiba, Tehran nung aliba St. Peter's Evangelical Arogo Tenla ki noksa nung angur.

July 09, 2026: Iran nung ketdangsertemi linük nung Protestant Tenla ki tejentiba rakzüksü atema inyaksangshir aser Tenla ki compound nung aliba Khristanem danga pei ki toktsür oadokang, ta tuyuogo.

Iran yimtiba, Tehran nung aliba St. Peter's Evangelical Church Tenla ki ya Execution of Imam Khomeini's Order (EIKO) nem agütsüadoktsü.

Yimsü dak sendakba kiojen mesüra nija kiojen agiadoktsü atema sorkari EIKO organization nem tashi agüja lir.

Arogo nung lenirtemi ashiba agi, iba Arogo Tenla ki kima moapu nung Armenian aser Assyrian Khristan kibong 20 shi lidar, ajisüaka parnok dang taruba hopta ishika tsüngda ki toktsür aienshiang, ta tuyuogo.

Arogo nung züngsemtem danga tanga tesem ka nung ang tekülem agiang, ta tuyuogo.

Tehran yimti nung Arogo compound kimongji acre 10 shi lir. Iba kimong nungji Tenla ki, schools aser nisung aliba kiojen lir.

Tesüiba küm jenti iba kiojen nungji Iran nunger Khristanem lia arur, ajisüaka tang sorkar tetuyuba ajanga Khristan kibong aikati timtem ajangshitsü.

Osang angazükba agi, tawa Iran intelligence agent temi ghonda aika jungnüa Arogo compound ji asadanga liasü.

Ketdangsertemi Arogo nung lenirtem danga, Khristan kibongtem jagi Tenla ki compound ji toktsür moura nenok ajak aputsü ta amokmerenogo.

1990s mapang nung Revolutionary Court kati Arogo kimong aser kiojenji EIKO meyong, ta obendang agüja liasü. Iba sülen Arogo nung lenirtemi iba obendang anema ken o benok.

Tesüiba küm aika Arogo nung lenirtemi temepishiba agüja liasü, ajisüaka

ketdangsertemi Tenla ki aser Arogo kimongji agiadoktsü atema inyaksangshir.

Tang ketdangsertemi St. Peter's Arogo anema inyakba ya Persian-oshi jembiba Khristan yimsü samatsütsü atema inyakba lir.

Tesüiba küm ishika tsüngda Iran nung ketdangsertemi Protestant Arogo Tenla ki aika shibangtsüogo mesüra agiadokogo; item Tenla ki rongnung Tabriz aser Mashhad na nung aliba Presbyterian Tenla kitem aser Gorgan nung aliba Assemblies of God Tenla ki densema lir, ta osang ka ajanga metetdaksü.

Item kuli ajanga sorkari independent Protestant rejutem samatsütsü merangba aser ketdangsertemi yimsü azüoktsü merangba sayur.

1979 küm Iran nung Islamic Republic amenokba mapang nungi linük nung Khristanem anema inyakba kanga bulua kümogo.

Iran nung akhidang nungi aliba Armenian aser Assyrian Khristanembo 'protected religious minorities' ta züngshir, ajisüaka iba jenjang ya tamajungba dang kümdar.

Iba linük nung talisa Islam yimsü toktsür Khristan yimsü agizükertem kanga reshikangshir aser Iran nunger ozüng kübok parnok nem teküzmükba kecha magütsür.

Iran nung ketdangsertemi Islam yimsü toktsür Khristan yimsü agizükertem ya linük security atema amokmeren ama züngshia parnok aika apur, asüngdangyar, tepuokdak puoker aser temerenshi balala agütsür.

2024 küm kija nunga Iran nung aliba court balalai Khristan 96 tepuokdak ayutsü obendang agüja liasü aser parnok ajak senteper jail kümsükji küm 263 liasü.

Aso 20buba mapang nung Iran nung Protestant

Arogotemi sademsadema Persian oshi nung tekülem agia liasü aser Muslim yimsü toktsürtem-a agizüka liasü, ajisüaka 1979 küm Islamic Revolution sülen nungibo ketdangsertemi Protestant Arogotem anema inyaker aser Persian oshi nung tekülem agiba nokdangar.

Tanübo Iran nung official süa recognize asüba Protestant Arogo kar dang anünga lir aser item Arogo nung Armenian mesüra Assyrian oshi nung dang tekülem agitsü melar.

Iran nung Persian oshi nung tekülem agiba anenadokogo, aser ibaji ajanga Muslim yimsü toktsür Khristan yimsü agizükertemi item ama Arogo nungji medenteter.

Joko iba linük nung Khristanem aikati mimshia dang tekülem sentong nung adener aser house churches nung adener.

Iran nung ketdangertemi St. Peter Arogo Tenla ki aser kiojen ajak agitsü atema inyaksangshiba ya International organizations aikati aitsüogo.

Tawa World Council of Churches (WCC)-i Iran ketdangsertem dang Arogo kiojen agiadokba ya anentsüla, Arogo nung lenirtem aser yangji alirtem amokmerenba anentsüla aser Iran nung Khristanem yimsü temeden kümzüksüla, ta takhangba agütsüogo.

WCC-isa linük balala nung sorkartem aser international teloktem dang akhidang nungi Khristanem aliba linük (Iran) nung Khristanem wazüka ayutsü atema inyaksüla, ta ayongzükogo.

Iran nung Khristanem reshikangshiba aser yimsü temeden anema inyakba agi küm shia U.S. Department of State-i Iran ya Country of Particular Concern (CPC) linük ta sangdonger.

ANOGO ABEN TSÜNGREM DEN

Tezülen - Mathi 10:17-20

Tanelai Taremzüker Agütsür. Aser kodang parnoki nenok o bendangdaki anidir, aser nenok bendanga agütsüdir, nenoki kechi jembitsü mapang matongdang terata. Saka iba mapang nungji nenok nem kechisa agütsüdir, aji nenoki jembiang; kechiaser tejembibaji nenok masü, saka Tanela Temeshi. Mark 13:11

Iba tekong aikati azünger aser sayutsüngir saka ya zülu dang kü mulung nung atangji Yisui ashiba ama tamang asoshi timtem rishikangshi aru nung kwikati aremtsü renema alitsü? ta asüngdanga zülu. Tanela Temeshi-i taremzüker agütsütsü ta kwikati amanger - aremzüker - nangzüker aser aremzüker.

Khrista tenüng nung aremzükbaji sempet ka lir. Tanela Temeshi shibai temenen nungi temulung meyipa anogo nung asen nüngdak ajak agütsü, kodang chubatemi, yimsüsürtemi Khrista magizüktsü indang jembidir Tanelai taremzüker sempet peria agütsütsü. Yisuji atangji Kibur, shibai tasü madak takok angu. Pai nüngdakra tasütsü tsübuba makai kümdaktsütsü anungji asenoki metsübu Pa tenüng nangzüksüla. Iba tenangzükbaji Par chirtem nem taküm bener arutsüba nok-o-nü aser chubatem aser yimsüsürtemi anema jembidang Pa nüburtem nem tashi agütsüba lir. Pai agütsüba taremzüker taküm aser Pa taochi ajanga asenoki Pa tenüng nangzükbata tatem tashi alitsü.

Kibuba Yisu, Ne Tanela Temeshi ajanga Nai onok nem taremzüker aser tashi agütsütsü nangzükbata nung onok mulung sünepjang. Amen.

Israel-i tang mezüng Christian Special Envoy shim



George Deek (Special Envoy to the Christian World) aser Israel Minister of Foreign Affairs, Gideon Sa'ar na noksa nung angur.

July 09, 2026: Israel nung Ministry of Foreign Affairs-i tang mezüng Special Envoy to the Christian World shimogo.

Special Envoy mezüngbubaji George Deek asütsü.

George Deek Special Envoy to the Christian World shimba sangdonga Israel Minister of Foreign Affairs, Gideon Sa'ar-i sangdong ka ajanga, "Israel atema Khristan lima aser alima tesem balala nung Khristan medemertem den tesendaktep tajung ayutsüji kanga tongtibang onük ka lir. Kanga akhümtsübu aliba aser mapa nung kanga tetangshi ketdangser George-i Israel aser Khristan lima na tsüngda tesendaktep tashi taitba kümdaktsütsü atema inyaksü, ta ni amanger," ta metetdaksü.

Israel nung mapang shia Khristanem anema inyakba osang prokshir, aser alima tsüngdang Israel nung Khristanem junga züngshiba sayutsü nükjidong nung Special Envoy shim.

Tawa Israel Defence Force-ia Khristanem anema inyakba tatalokba aika lir.

Taküm April ita nung IDF sepai kati Lebanon nung Yisu Khrista kürakyanglu ka raksatsüba sülen pa anogo 30 nü tepuokdak yua liasü. Iba sülen May ita nunga Yirusalem nung Israel nunger kati France tsür 'nun' ka dak teka sangshia liasü.

May ita nungsa Labenon kübok Khristan yim, Debel nung Israel nunger sepai anati tasüngtet Mari tebang nung moko mangumtsüba sülen tena tepuokdak ayu.

George Deek ya Israel kübok Jaffa yimti nungi Arab Khristan ka lir.

Tesüiba küm 18 tashi pa ketdangser inyaka arur aser tang tesüsa Israel's Ambassador to Azerbaijan inyaka liasü.

Deek tebu, Youssef Deek ya küm aika Jaffa aser Israel nung Orthodox Christian Chairman inyaka liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimym

Yizük

(v) tema nung aliba süng ama ka amshia agizükba (take down something by a hook)

* Kilem tema nung sü tsüka aliba süng talangka bener arua yizük.

Yizük

(v) ayi ama agi mereta yirutsüba (injured by thorn type things)

* Ni arem ajanga aodang süng taju ka nung kü tepen yizük.

OLONG PAITEP # 7561

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki
3. Asür mangyimba
5. Temulung nung shisadang
8. T ___ lu
10. Takdang temalen
11. Tesa ___ a
13. Ajungbena temulungjang
- tongtonglatsü atu
15. Tejen lai nung tesayur
16. Tsüngsak-mopung

-

(5)

-

(5)

-

(5)

-

(3)

-

(9)

-

(3)

-

(5)

-

(5)

-

(5)

LANGTSÜNGLEN

1. Reprangdaksü
2. ___ ur
4. Kiojen yangludak
6. ___ ait
7. Nagaland nung ayong ka
9. Küm kasa purtem
10. Tetsüng tajemetdak
12. ___ adenshi
14. Tsünüsenbongtsü adokdak

-

(4)

-

(3)

-

(6)

-

(7)

-

(5)

-

(5)

-

(6)

-

(4)

-

(3)

OLONG PAITEP # 7560 TELANGZÜBA**TIPIEN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER

Major League Baseball-i India nunger nüngtugu cricket asayar Suryakumar Yadav MLB Ambassador asütsü shimba sangdongogo. India nunger sports fan tem baseball den sendakteptsütsü nükjidong nung tang iba jenjang agiogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

Manipur nung KCP, KYKL nungi züngsem ana apu

Imphal, Chiteni/July 9 (Agencies): Manipur kübok lenden nung aliba district tem nung Brehostibarnü security force temi meita aoba mapang telungpur ana puogo aser parnok ket nungi 9 mm pistol ka, injang aser hand grenade ngutetogo.

Manipur Police sangdong ka ajanga ashiba agi, telungpurtem ya rakzükrakdem, ozüing alema prangbong injang shibelenba aser tesem balala nung hand grenade tem rema toktsüba nung densema liasü.

Mezüngbuba meita aoba mapang security personnel temi

Kakching district kübok Umathel Makha Leikai nung alir Communist Party (KCP-PWG) züngsem Angom Chingkheinganba Meitei (27) puogo. Pa ya Waikhong Police Station kübok Aihang yimtsüing anasa apu.

Tanga tatalokba ka nung sepaitemi Kanglei Yawol Kanna Lup (KYKL) züngsem Takhellambam Gremichand puogo. Pa ya Imphal West district kübok Singjamei Mayengbam Leikai nung alir. Pa Irilbung Police Station kübok Kalika Bamon Kampu tesem nung apu.

Meita aoba mapang security personnel temi pa ket nungi 9 mm pistol ka, magazine ana, injang 70 aser hand grenade tem nguteta liasü.

Police-i ashiba agi, pua alirtem aser parnok ket nungi ngutetba prangbong ijang aser bomb tem ken o dak sendaka aliba police station tem nem bendanga agütsüogo.

Ketdangsürtemi ashiba agi, telungpur inyakyim, rakzükrakdem aser ozüing alema prangbong injang shibelenba nokdangtsü atema maneni jenjang agidar.

New Delhi nung Meghalaya jiru benjung amungtsü

Shillong, Chiteni/July 9 (Agencies): Meghalaya sorkari New Delhi kübok Dilli Haat nung July 10 nungi 12 tashi Meghalaya Pineapple Festival ayongzüka amungtsü. Iba ajanga state indang alima ajunga nung nüngtugu juri sayatsü aser aluyimertem atema shishilembatsü asoshi lenmang tasen lapoktsütsü.

Iba benjung ya Department of Agriculture & Farmers' Welfare-i ayongzüksü, koba juri alu ayimertem consumer, retailer, institutional buyer, chiyongtsü shishilembar aser export market tem den sendakteptsütsü asoshi sabang tajung ka asütsü.

Meghalaya sorkar Vision@2032 framework kübok aluyimba ya rongsenketzüng terenlok asoshi tongtibang sector ka kümdaktsütsü asoshi

sentong yanglur aliba nung iba inyakyim ya-a shilem ka asütsü. Ano iba ya Meghalaya State Organic Mission den sendaktepa lir.

Sen crore 295 entoka inyaksü aliba sentong ya 2028 küm tashi nungbo certified organic cultivation kübok ali hectare lakh ka aitdaksütsü nükjidong nung tenzüko. Iba ajanga aluyimer 90,000 dak tema cooperatives aser producer telok 600 dak tema ajanga ajangzükdaktsütsü.

Meghalaya indang juri ya kanga tanang, acidity aser Brix value (16-18°) ajema aliba ajanga kanga nüngtugu lir, aser India nung tsünütetba jiru tanangtiba rongnung ka lir. Iba süngja ya Dubai nung Lulu Hypermarkets aser UAE-i yokba ajanga alima ajungai meteta kümogo, aser aluyimba

lokti tentet Jirang Organic Agro FPO amalai aluyimertem bendanglen shishilembadak balala den sendakteptsü asoshi teyari agüja arudar.

State nung atangba jiru ya 2023 küm metric ton ayok aser 2025 kübok metric ton 15.4 yokogo aser kasa mapang nung aluyimba lokti tentet balala Reliance Fresh, Amazon Karigar, Safal Foods Pvt. Ltd. aser Blue Tokai Coffee Roasters amala tongtibang company tem den partnership yangluogo.

Iba benjung ya July 10 nü Union Minister for Development of North Eastern Region (DoNER) and Communications Jyotiraditya Scindia-i lapoktsütsü aser Meghalaya Chief Minister Conrad K. Sangma tetushi tejaoker asütsü.

CoTU-i NH-2 nokdang aliba lapoktsütsü mepeshi

Imphal, Chiteni/July 9 (Agencies): Manipur kübok Kangpokpi district nung Kuki-Zo nunger tenüng nung nokdakba lokti tentet Committee on Tribal Unity (CoTU)-i, National Highway-2 ita junga nokdang aliba lapokja tenüngdakba osettem tetsükdaktsü makai supply südaktsütsü asoshi mepeshia Angh Ajay Kumar Bhalla dangi tezüluba nung takhangba ka agütsüogo.

Iba shiti ya copy ka Chief Minister Yumnam Khemchand Singh nema agütsüogo. Shiti nung CoTU-i ashiba agi, lenmang nokdanga ayuba ajanga, chiyongtsü, mozü aser tanga tenüngdakba osettem Imphal aser Dimapur nungi bener aruba nung tetsükdaktsü adokogo, aser iba ajanga Kangpokpi district nung alirtem

kanga timtemteper.

Iba lokti tentet yagisa, iba tenokdangba ya Naga nunger trok tepsetba aser ken o takaratiba nung bentettsütsü khanga Naga nunger teloktemi benoka lir ta ashi.

CoTU-i, tenokdangba ya south nung Namdilong-Kanglatongbi, west nung IT Road kübok Chawangkinig, north nung Senapati anasa Taphou Naga aser east nung Yaingangpokpi ta tongtibang tesem pezü nung agütsü lir, aser iba ajanga district-i ili adokli asütsü mesademi kümogo.

Parnoki ashiba agi, lenmang mapang talangka nokdanga ayuba ajanga Kangpokpi district nung Kuki-Zo, Gorkha (Nepali), Poumei aser Thangal nunger lakh 1.5 shi tenüngdakba oset agi kanga anünga kümogo. CoTU-i Angh dang chiyongtsü,

mozü aser tanga tenüngdakba osettem kecha tetsükdaktsü makai shibelentsü asoshi takaratiba nung jenjang agitsü mepeshia metetetdaksüogo.

Tensa mejungi aliba dak sendakba nung CoTU-isa, state sorkar dang telungpurtem anema jenjang tapet agitsü aser talisa National Socialist Council of Nagalim (Isak-Muivah) inyakyim nokdangtsü ayongzüko. Iba telok yagi temzüng ozüing tsütsü tetsükdaktsü adokba nung shilem agir, ta ashi.

Maneni iba lokti tentet yagi Angh tang iba ken o ya tongtibangsa agitsü mepeshiba den, lenmang maneni nokdanga ayuba aser supply chain tem nung tetsükdaktsü adokba ajanga Kangpokpi nung humanitarian tensa tamajungba kuma aotsü, ta ashi.

Ukraine-i patriot missiles yanglutsü licence angutsü: Trump



Ankara, Chiteni/July 09 (Agencies): US Tir Donald Trump-i Ukraine nem Patriot interceptor missiles yanglutsü temeden agütsütsü ta ashi, koba ajanga Russia-i ballistic missile amshia amakba nungi Kyiv kumzükba nung yaritsü.

"Patriots yanglutsü atema onoki nenok nem licence ka agütsütsü. Onoki rasaa ashiba sülen parnoki kanga kera yanglutettsü ama ni bilemer," ta Trump-i Ukraine Tir Volodymyr Zelenskyy dang Bodhbarnü Ankara nung NATO senden alidang ashi.

Pai iba telemtetba ano defence manufacturers Lockheed Martin and Raytheon dang mashi saka ajungtsü, ta shia liasü.

Patriots yagi missiles tem aruba puteta anüngla nung lia raksatsür aser alima nung air defence systems tajungtiba rongnung ka ta züngshir aser jenjang tasaktiba - battery ka den missiles dener sen \$1 billion shi lir.

Ajidang mashi iba hadir yanglutsü ya mapang talanglang agir, koba küm ka nung missiles 600 dang yangluteter, ta US Department

of Defence ajanga ashir.

US-i patriots ya kata magütsüner, kechiaser parnoki küm tetenzüklen Iran den raradang par ket nung aliba tesadang dak tali amshiadokogo, ta US nung aliba think tank Center for Strategic and International Studies (CSIS)-i ashir.

"Ozü ket nung Patriots lir, saka aikabo masü. Onok asoshia itemji nüngdaker," ta Trump-i ashi.

Ajisüaka Ukraine-i itemji tangsa nüngdaker. Tawa Moscow-i ballistic missile amshia Ukraine dak amakba tali kumogo, aser taoba hopta Kyiv kisünga nunga nisung aika takum samatsüogo.

Ukraine-i US dang Patriots yanglutsü atema license agüjang ta asüngdangogo, ta Zelenskyy-i May ita tatemlen shia liasü.

Küm pezü ser tesadang rara aruba sülen front line nung raraba timba anendaka lir, Black Sea nung anendaka lir, aser Russia-i ammag shia drones noklang aika amshia amakba den kasa tokteptsü Ukraine-i angazükogo.

Ajisüaka ballistic missiles ya kanga kera ali nungi talangka mepilai jajar, anungji itemji soittsü tasak akumer.

Ballistic missiles aika Ukraine indang tetembanger aliba air defences alema aiter.

Hopta tetenzüklen Ukraine Air Force ajanga ashiba agi, interceptor missiles kanga anüngba ajanga Deobar aonung Russia-i ballistic missiles 23 khaloktsüba kata khazüka meyoktet. Iba mapang nisung

20 dak tema asü.

Trump-i ashiba agi, US-i Kyiv nem Patriots yanglutsü licence agütsütsü, anungji parnok nem peria magütsür ta parnoki meshitettsü.

Ajisüaka tang Ukraine litsü nung interceptor missiles yanglutsü tasak asütsü ta Kyiv nung alirtemi arendaka bilemer.

Ukraine defence asoshi Patriots ya kanga tongtipang lir, ajisüaka Ukraine-i iba ama nok-nü meyanglutettsü, kechiaser ibai yanglutsü kanga tasak, ta ex-security service officer Ivan Stupak-i ashi.

Ukraine nung iba ama nok-nü yanglua amshitsüsa tesem kecha kumzüka mali, anungji European linük nung yanglutsü akok, aser ibaji ita aika agitsü, ta pai ashi.

TENÜNGSANG AGÜTSÜR



Lt. Sangtali Chirnur Aser Semchirtem-i Wb. Onentiba Aser Wt. Tsumaktula (Changtongya Yimsen) tena jala **Kr.Temsüinla-i** Regional Rural Bank tatidang nung Office Assistant mapa ngutetba asoshi tepela tulu aser konang tetushi agütsür.

Tang aser tarutsü anogotem nung asen Tulusang Tsüngremi nü wadang nung teti azükarua moajangma.

Rong mejennü (Decorated Spear)
Folding / Unfolding
alir lira iba Phone No. nung tongtepanma
#9077123979 / 9856538495

Hopta tatemlen ASEAN foreign ministers tem senden ka amentsü

Hanoi, Chiteni/July 09 (Agencies): Southeast Asian bloc ASEAN indang Foreign Minister temi Myanmar foreign minister den 'informal' senden ka Bangkok nung July 12 nü amentsü, ta Thailand aser Vietnam nati Brehostibarnü ashi.

Küm tetenzüklen election agiba sülen Myanmar nung army temi yariiba sorkar tasenbai par lenirtem nokdanga aliba agiendaktsütsü lenmangtem bushir, shirnok 2021 küm mitkar tashi amshia sorkar atsüngdoka iba sülen civil war tenzükba sülen ASEAN senden nung shilem magidaktsü aru.

"Bangkok senden ya ASEAN foreign ministers tem indang-indanga tangatetba lemsateptsü, tesendaktep tashi

itshitsü aser Myanmar nung akangjunghshiteptsü asoshi jembitsü maongka ka lir," ta Vietnam foreign ministry odongtar Pham Thu Hang-i osangbener dang ashi.

Thailand indang foreign ministry-ia osangbener senden ka nung iba senden amentsü aliba indang jangjatsü.

Myanmar nung mapang talangka civil war aliba ajanga makamait linük nung takoksa tulu ajurua nisung 100,000 dak tema takum samar ano million aika pei ki yutsür tesem balala nung lir, kong telungpur telok balalai mitkar anema rarar.

Association of Southeast Asian Nations foreign ministers senden ka May ita amendang Thailand-i ajungmesoba sülen

Myanmar indang foreign minister den virtual meeting ka amentsü mulungtepa liasü aser Naypyitaw nung administration tasenba den tajungba nung jembishinütsü lenmang tasen ka lapok.

Züngsem 11 aliba ASEAN-i "five-point consensus" ta ajaba yimjung sentong ka sülen Myanmar mitkar lenirtemi anidaktsü memulungba sülen iba bloc ya Myanmar nungi pila, saka par züngsem linük aika yimya melenshiogo.

Myanmar indang taoba mitkar tekolak, Min Aung Hlaing, shiba tir akum, pai taoba hopta Laos semdang, koba pa asoshi civilian mapa tasen agizüker ASEAN züngsem linük mezüngbuba semdangba alitsü.

Onoki Gulf nung US military targets tem makogo: Iran

Dubai, Chiteni/July 09 (Agencies): US-i Iran south tsütsü tzükumlen aser east tsütsü province balala nung amakba sülen Brehostibarnü Iranian armed forces temia kidanger Gulf linüktem nung US military infrastructure makogo, anungji hopta asem tain ceasefire agreement nung mepetmesü tali akumer.

Brehostibarnü Iran ya ano linük northeast tsütsü temeshi tesem, Mashhad nung asür Supreme Leader Ayatollah Ali Khamenei aremtsü renemba mapang lir, koba hopta ka mass funeral procession agia aruba tatembang alitsü. Khamenei-i rara tenzükknü February 28 nü US-i tayimtsü amshia amakdang tepset.

US mitkari Bodhbarnü ashiba agi, tang tesüsa Iran dak amakba ya Strait of Hormuz nung Iran-i tankers asem dak amakba sülen iba tesem lapoka ayutsü nükjidong nung lir.

US Tir Donald Trump-i Iran den interim ceasefire züngzüktepa aliba tembangogo ta amanger ta shir ghonda ishika lir Iran dak amak tenzük.

Iran ketdangsür temi ashiba

agi US-i July 8 aser 9 nung provinces pongu nung amakdang nisung 14 tepset aser 78 yirutsü, ta state media ajanga ashi. Fars news agency ajanga ashiba agi, US-i amakdang Russia aser China den shishilempatsü amshiba rail apu ka nung kongshi.

Brehostibarnep Iran indang Bushehr province nung ola tulu adoka apokba angashi, ta semi-official Mehr news agency ajanga ashi. Bushehr nungya Russia-i yangluba nuclear power plant lir.

Iran indang army temi Kuwait nung US Patriot systems dak drones agi amak, Qatar nung early warning site (satellite antenna) aser Bahrain nung US army indang totzü rizünga ayuba tesem ka ama ta sangdong ka nung ashi.

Kuwait-ia par airspace nung armed forces temi cruise missile ka, ballistic missiles asem aser drones 10 khazüka yok aser oset teraksa tsükba mapang nisung ka yiru ta ashi.

Qatar, kong region nung US military base tulutiba amenoka lir aser aiben Washington aser Tehran densema par tsükchir

tetsüngtai ia yimjung asoshi inyaker, parnoki tangatettep dangi meyiptsü ayongzüka liasü.

Iranian Foreign Minister Abbas Araqchi den phone ajanga jembidang Qatar Ato Kilonser Sheikh Mohammed bin Abdulrahman al-Thani-i Strait of Hormuz nung commercial rong dak tenük yoker amakba aitsü.

Rong dak amakba atema Iran-i tenüng agia mali, saka yimjung asoshi jembishinü nung jenjang ulushitsü atema Tehran-i iba ama inyaker ta asadanger temi ashir.

US aser Israel nati February 28 nü Iran dak maka rara metenzükdang alima nung totzü shilem 20 shi iba Strait of Hormuz ajanga bena liasü.

Iba sülen Tehran-i strait ya azüoka lir, anungji alima nung mitkar tashi tulutiba aliba linük den raraba nung kasa toktepa arur.

"Mesüshiba aser inyaktsü züngzüktepbba ama meinyakba nung takoksa lir ta US-i ano mangazüki lir. Ya jangja-jangja shiner: Nenoki makra, nenok daka meyiper amaktsü," ta Iran indang top negotiator Mohammad Baqer Qalibaf-i X

nung zülü.

"Strait of Hormuz ya US-i amokmerenba ajanga masü Iran nungeri mulungba nungang tanaben lapoktsü."

U.S. Central Command (CENTCOM)-i Bodhbarnü ashiba agi, par sepaitemi Iran tzükumlen air defense systems, coastal surveillance assets, missile aser drone rizünga ayuba tesemtem, naval capabilities, aser military logistics infrastructure densema Iranian military targets 90 shi nung makogo.

"Tongtipang international tzü lenmang nung shishilempaba rong aser civilian crews dak kuli tejangja makai tawa tashiyim amshiba atema Iran-i khu abentsü ta United States tangatetba nung nokdaka lir," ta CENTCOM ajanga sangdong ka nung ashi.

"Ibai yashi Iran-i rong tem nung bomb pokloktsüba temerenshi lir. Ibaji ano atalokra, kanga agi tamajungba akumtsü!" ta Trump-i pa indang Truth Social sapang nung Bodhbarnü zülua liasü.

Ajisüaka Turkey nung NATO summit nung dena

alisang US leniri tang tesüsa mitkari amaba ajanga Iran den rara tesashiba akumtsü amabo mebilemer ta ashi.

"Kechi atalokdir aji kanga kera tembangtsü... aser totzü densema ibaji ajanga tajungba akumtsü," ta pai Ankara nung osangbener dang ashi.

Bodhbarnü NATO summit metenzükdang, Iran den memorandum of understanding zülutepa aliba tembanger asü ta asüngdang dang, "Iba tasüngdangba ya kanga tajung. Ni atemabo ibai tembangogo. Ni Iran den mejembiner," ta Trump-i ashi.

"Onoki Iran den tezüngzüktep ka yanglununga, yangji alitsü asü masüar ni memetet," ta pai mapang tatsüka lir ashi.

Tan hopta rong asem dak amakba nung Qatari LNG tanker Al Rekayyat ya Oman tzükumlen teyari ataa lir. Iba rong nungya Mongulbarnü menur projectile kati kongshia engine room nung mi adok, ajisüaka industry sources ajanga ashiba agi, rong ya kumzüka lir aser tang atemapo mapoktsü ama ajiteter.

Kohima District Inter High School Badminton asayamung tenzükogo



Dimapur, Chiteni/July 9 (TYO): 1buba Kohima District Inter High School Badminton asayamung July 9 nü Indoor Badminton Stadium, Officers' Hill, Thegabakha nung tenzükogo. Sentong nung Director of School Education, Razouseyi Vese alakteta jaoker liasü.

Sentong nung o jembiba mapang iba asayamung ayongzükba atema aser grassroots level nung badminton asaya ajungkettsü asoshi jenjang agiba atema Kohima District Badminton

Association (KDBA) nem tenüngsang agütsü.

Pai, saisabong ajanga lanurtem yimya tajung süpadaktsütsü, teamwork, tanen makai inyaksü aser lenir kaka akümtsü atema tangazükba agütsütsü asoshi tongtibang sabang ka agütsür, aser iba den parnok shi-temang aser tekelok shisatsü anema aser renloka yoktsü asoshi teyari agütsür ta ashi.

Asayamung nung shilem agirtem dang iba maongka ya takok tashi agitsü ajungshia pai parnok dang bendanga

agüja aser asayar tanüla tajung benshia tokteptsü aser asaya aser kakat shisatsü bushiba liromedemdaktsütsü ayongzükba liasü. Paisa, tesayur, tsürapur aser lokti dang lanur asayartem maneni nongita yaritsü mepeshiba den, iba amala inyakyim ajanga tarutsü nung Nagaland aser linük tenüng nungi asayatsüpurtem anitetsü, ta ashi. Iba sülen pai asayamung lapoktsü.

Sentong nung KDBA tir Kezhalezo Solo-i lokti pela agizükba o jembiba mapang, iba asayamung ya telungjem adokdaktsütsü, sportsmanship ajungkettsü, school tem yongtsü nung tesendaktep akangshitsütsü aser lanur asayartem nem parnok sempet sayatsü atema sabang ka agütsütsü nükjidong nung ayongzükogo, ta ashi.

Asayamung ayongzükba nükjidong indang jembiba mapang KDBA Vice President (Administration), Kekhrie Pfkukha-i, asayamung ya saisabong ajanga lanurtem sempet a r a n g t e t s h i t s ü t s ü , yimayimpong tajung süpadaktsütsü aser teamwork angazükdaktsütsü atema lir ta ashi.

Man Utd-i Santos atema pound million 50 agütsütsü mulunga agizükogo



Chiteni/July 9, 2026 (Agencies): Manchester United-i Brazil nunger midfielder Andrey Santos atema Chelsea nem pound million 50 agütsütsü mulunga agizükogo.

Hopta tatemi United-i Santos alitsü tejangraba aliba metetdaktsüba sülen ghonda ishika tsüngda club ana tsüngda tangatettep ka dangi aruogo.

United-i Santos atema mezüng pound million 48 agütsütsü aser iba den bendenloksema 'achievable' add-ons ama pound million 2 agütsütsü. Chelsea-isa, 10% sell-on clause ka benokogo.

Santos ya medical agitsü anunga lir. Brazil team World Cup nungi tsükba sülen Ederson-a Italy club Atalanta nung pound million 35 yong oa adentsü renema lir.

United nungi asayar tejentem pre-season training atema adenshitsü lia tang iba osang ya sangdongogo.

Asayar tejen Casemiro-i club toktsüba sülen United pur central midfield dak rangloker

inyaksangshia arudar. Manuel Ugarte ayoktsü liasü, saka Uruguay nunger international asayar ya temekok yirur mapang talangka masayatetsüsa kümogo.

Kasa mapang nung Nottingham Forest nungi Elliot Anderson alitsü atema timla aliba samaogo, kechiyong pa ya pound million 110 dak tema agi ayoktsü ta jangja kümogo.

Iba sülen United-i West Ham nungi Mateus Fernandes alizüktsü merang, saka pa Tottenham nung pound million 85 agi denogo.

Kobbie Mainoo England tenüng nungi World Cup nung asaydar asünung, pre-season nung United pur July 18 nü Helsinki nung Wrexham den mezüngbuba asayaba mapang Michael Carrick indang squad nung senior midfielder tem rongnung Mason Mount kija alitsü.

Marc Cucurella Real Madrid dang ayokba aser Tyrique George Everton-i aoba sülen Santos ya Chelsea toktsüba asayar tasembuba asütsü.

TESÜSABA ASAYA OSANG				
Switzerland	4	3	Colombia	
QUARTER-FINALS				
July 10	1:30 AM	France	VS	Morocco
July 11	12:30 AM	Spain	VS	Belgium
July 12	2:30 AM	Norway	VS	England
July 12	6:30 AM	Argentina	VS	Switzerland

Saibari yiruba ajanga France den quarterfinal masayatetsü

Chiteni/July 9, 2026

(Agencies): France den World Cup quarterfinal masaya tsüngda Morocco atema takoksa ajurua forward Ismael Saibari yiruba ajanga iba asaya nung masayatetsüsa kümogo.

Canada den round of 16 asayaba mapang Saibari temang nung timtem adok aser pa minute 22 dang asayar melena liasü. Iba sülen pa tetendanga balala agiogo aser pa France den taruba asaya nung masayatetsü ta jangjaogo.

Ajisüaka pa kanga mejungibo meyiru aser FIFA World Cup quarterfinals nung France kokra pa Morocco tenüng nungi semifinal nungbo asayatetsü.

Iba osang ya Morocco coach Mohamed Ouahbi-i metetdakja liasü. "Saibari dak alaka ajak asayatetsü, kechiyong pa asaya tenzükshitsü asoshi karara," ta Ouahbi-i osangbenertem dang ashi. "Ajisüaka pa asayamung ajunga masayatetsü tabo masü," ta paisa shisem.

"Ajak asayatetsü, ajisüaka onoki 100% anema aliba asayartem dang shimsü," ta pai ashi.

Saibari masayaba ya Morocco atema takoksa tulu asütsü, kechiyong taküm FIFA World Cup nung pai team atema



kanga junga asaya arudar. World Cup group stage nung pai Brazil, Scotland aser Haiti den asayaba mapang goal idaktsüogo. Round of 32 nung Netherlands den asayaba mapanga pai takoker bendangtsü atema metsüba penalty ka idakja liasü.

Kasa mapang nung Canada den asayaba mapang Soufiane Rahimi-i Saibari melen aser France den asaya nung pa asayatsü imlar. "Tetoktepba ka nung talangka asaya onera asayar ajak nüngdaker, aser asayar shirnok tetenzük nungi masayateter parnoki asaya tembang asayatsü maongka lir ta meteta lir. Onok rongnung asaya tetenzük nungi asayatsü purtem lir aser shirnok asaya tom nung aier parnoki onok asoshi temelenshi bener arutsütetsü," ta pai ashi.

Maneni Chadi Riad, shiba yiruba ajanga Canada den asaya nung masayatet, pa France denbo asayatsü imlar.

AIFF aser ISL na tangatettep ka dangi aruogo

Chiteni/July 9, 2026

(Agencies): All India Football Federation aser Indian Super League na club-i aniba league ka asoshi küm pezü atema tenangzüktepba ka yangluogo, ta The Times of India sangdong ka ajanga metetdaktsü.

Inyakyim kübok ISL commercial operations achaayangtsü atema Special Purpose Vehicle ka amenoktsü. Club 14 pronglai mulungra AIFF nem administrative fee ama sen crore 15.4 agütsütsü aser iba den bendenloksema league indang net profit nung shilem 10 agütsütsü.

Osang ajanga ashiba agi, ISL club tem aser AIFF na onük asem nung tangatettep ka dangi aruogo, kong SPV independent auditing,

federation nem net profit shilem 10 agütsütsüba aser termination clause ka enoktsüba densema lir.

Linük nung football asaya achaayangba lokti tentet ama AIFF-i refereeing, legal compliance, integrity aser anti-doping operations ajak ketdang asütsü. Iba den mezüngbuba küm crore 1.1 agütsütsü aliba den bendenloksema ISL club temi taruba küm asem tsüngda sen crore 1.15, 1.2 aser 1.25 agütsütsü.

"ISL ya commercial tsütsü club-i aniba model ka nung inyaksangshitsü. Asayamung nung shilem agiba taah meshia

club 14 prongla dangi shiti ka yoktsü. Parnok telangzüba dak ajemdaker league ya koda asaya aotsü iba atema telemtetba ka agitsü," ta AIFF Deputy General Secretary M Satyanarayanan-i ashi.

"Onoki küm pezü atema iba model benoker. Küm ana sülen club temi iba model toktsütsü asü maneni benoka inyaksü aji lemtetsü," ta paisa shisem.

Ita ana tejakdang club temi aniba model ka atema benokba AIFF-i magizüki liasü. Ajisüaka taoba ita Mansukh Mandaviya den senden ka amenba sülen tang parnok tamendakdak melenshiogo.

BILEMDANGANG

"Langka tasen angazüktsü atema kecha temeno mali."